


Noticia
Transparente
di Gobierno

ISLA ONLINE

Diahuebs 12 September 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



Pabien San Nicolas, pabien Aruba

PROME MINISTER TA FELICITA SAN NICOLAS CU E GROUNDBREAKING DI E PROYECTO DI EMBEYECIMIENTO DI RODGER'S BEACH

E beach lo bira mas grandi y lo tin mas espacio pa pueblo por disfruta



Diaranson anochi, 11 di september a tuma luga na San Nicolas, e ceremonia di groundbreaking di e proyecto di embeyecimiento di Rodger's Beach. Prome Minister Evelyn Wever-Croes tawata presente pa e ocasion aki hunto cu Minister Dangui Oduber, Minister Endy Croes y Minister Xiomara Maduro.

Prome Minister ta indica cu ta trata di un bunita proyecto unda lo aplica e principio "Build with Nature", cu ta un principio cu DOW ta aplicando ya pa un tempo caba durante proyectonan. Esaki ta encera cu lo cuida e naturalesa y duna bek na naturalesa loke ta di dj'e.

Durante e proyecto di embeyecimiento di Rodger's Beach lo kibra e asfalt unda actualmente autonan ta staciona y asina e beach lo bira hopi mas grandi y asina lo tin mas espacio pa e pueblo por bin disfruta di e bunita beach.

Ultimo temponan Gobierno ta wordo critica pa kita beach di e

ciudadanonan pero cu e proyecto aki lo duna bek na e pueblo di Aruba. E principio di "Build with Nature" ta duna mas realce y proteccion na e naturalesa y cu esaki ta bin cu e area di e beach lo bira mas grandi y mas bunita.

"Mi ta felicita y gradici Minister Dangui Oduber pa su curashi y determinacion. Nos a encontra hopi reto na caminda pero cu su determinacion nos por a surpasa tur obstaculo y awe nos ta na e groundbreaking di e bunita y importante proyecto aki pa San Nicolas. Pabien tambe na ATA, DOW y tur stakeholders cu a haci e proyecto aki posibel.

Ora cu mi a yega Rodger's Beach mi por a weita e bahada di solo. Tawata un bista impresionante y un bunita momento pa relaha y recarga. Ora e proyecto aki ta cla aki 4 luna lo por disfruta miho ainda di momentonan asina. Pabien San Nicolas, pabien Aruba", Prome Minister a expresa. ■





PRESERVACION DI NATURALES A DI ARUBA TA PRIORIDAD; NO BENEFICIO DI INTERES NAN PERSONAL DI POLITICONAN



Minister di Naturalesa, Sr. Ursell Arends a enfatisa e necesidad critico pa un gobernacion responsabel y conservacion di e patrimonio natural di Aruba. Ultimo decadanan por a nota e impacto negativo di decisionnan populista, acuerdonan corrupto y accion politico irresponsabel, cu awe a contribui na degradacion di Aruba su medio ambiente.

Ciudadanonan ta bon na altura cu e economia di Aruba ta depende di turismo, un sector directamente relaciona cu Aruba su paisahenan natural, entre otro su lama, santo blanco y temperatura caribense. Sinembargo, practicanan di desaroyo no sostenibel y falta di regulacion suficiente a hiba nos na un degradacion ambiental significativo, menasando no solamente e beyeza natural di nos isla, pero tambe e fundeshi di nos economia. “Nos a faya pa balansa desaroyo cu e proteccion di nos isla,” Minister Arends a remarca. “E falta di balans aki a resulta den consecuencia dañino pa nos medio ambiente, cu ta poniendo den peliger e industria di turismo cu ta directamente sostiene nos economia.”

Involucrando Ministerio di Naturalesa den procesonan cu ta toca infraestructura y cualkier desaroyo di Aruba su tera, tabata un paso vital pa duna naturalesa un boz. Sinembargo, e caminda pa desaroyo responsabel ta rekeri un compromiso continuo y

atencion na conseho di e expertonan. Ministerio di Naturalesa, Directie Natuur en Milieu y varios organisacionnan ambiental, ta keda enfatisa e importancia di tende di expertonan ora ta tuma decisionan cu lo afecta Aruba su naturalesa.

“Apesar di tur retonan cu nos a bin ta enfrenta, entre otro tur e permisonan sin base cu a wordo otorga, nos ta keda comprometi pa restaura e balans,” Minister Arends ta agrega. “Nos ta traha activamente pa asina cada futuro proyecto di desaroyo riba Aruba ta alinea cu metanan di sostenibilidad y consciente di e efecto ambiental. Esaki ta inclui revisa e permiso di por ehempel hotel, beach y otro desaroyonan pa asegura cu nan ta ricibi recomendacion positivo di departamento relevante prome cu nan wordo aproba.”

Lamentablemente esaki no tabata caso den pasado unda awe nos por mira diferente inversionista encontra cu problema legal pavia di no cana e caminda corecto. Ministerio di Naturalesa ta haci un apelacion na tur stakeholder, incluyendo lidernan politico, inversionistanan y e pueblo, pa pone e preservacion y proteccion di recurso natural di Aruba riba esun cu lo beneficia interesnan personal. E esfuersonan continuo di Ministerio di Naturalesa ta basa riba un vision caminda desaroyo economico ta den harmonia y balans cu preservacion di nos naturalesa.



MINISTER MADURO DI CULTURA A RICIBI BISHITA DI CONSUL DI COLOMBIA NA ARUBA



E siman aki Minister Maduro di Cultura tabata tin e grato honor di ricibi bishita di e Consul di Colombia na Aruba sr. Gustavo Serrano Amaya y Auxiliar de Mision Diplomatica sra. Pilar Rojas. E bishita tabata den cuadro di un intercambio cultural cu Embahada di Colombia na Hulanda tin deseo di tene cu Aruba y Corsou.

Pa Aruba e deseo ta pa yega na un intercambio cultural cu Tumaco cu ta keda na e region Pacifico di Colombia. E intercambio lo consisti di tres actividad, un intercambio di baile entre hobennan di Tumaco y Aruba, un charla riba turismo

sostenibel y un tayer di gastronomia pa hobennan por cera conoci cu e arte culinario di Tumaco. E intencion ta pa e intercambio cultural aki por tuma luga fin di oktober.

Minister Maduro di Cultura ta aprecia e idea aki di intercambio cultural entre Aruba y Colombia den cual por estrecha mas e lazonan di hermandad cu ta existi entre e dos Paisnan y tambe di Colombia cu Reino Hulandes. E mandatario a gradici e Consul pa e bishita y e bunita iniciativa cultural y ta spera cu e intercambio cultural entre Aruba y Colombia por ta uno existoso. ■■■



MINISTER ENDY CROES TA FELICITA E EKIPONAN CU A TITULA CAMPEON DI COPA SANTA CRUZ SOFTBALL

Minister di Enseñansa y Deporte Endy Croes a acudi na e final di Copa Santa Cruz Softball cu a tuma luga na Veld di Olimpico. Durante e ocasion special aki, Minister Endy Croes a duna un discurso y a entrega premio na e ganadonan. Un total di ocho (8) ekipo di cabayero y seis (6) ekipo di damas a participa den Copa Santa Cruz cu a inicia 29 di juli y a culmina 1 di september 2024.

Minister Endy Croes a felicita campeon cabayero Roots y subcampeon Warriors y campeon damas Sweet Devils y subcampeon Warriors. Alabes ta felicita tur cu a destaca y a gana un premio individual den liga cabayero entre otro, 'Best Batter' Ruwin Tromp di Warriors, 'Best Homerun' Norangel Jacobus di Happy Brothers y 'Best Pitcher' Andrew Loopstok di Flatstone.

Pa loke ta trata liga di damas tambe tabatin varios premiacion individual entre otro, 'Best Batter' Wedoline Dirks di Splash, 'Best Homerun' Zjaika Kock di Sweet Devils y 'Best Pitcher' Irena Balijn di Beer Warmer Dolls. Finalmente, e mandatario di Deporte ta felicita Criojo Reds cu a organisa e tremendo campeonato deportivo aki. Cu disciplina, deseo, dedicacion y determinacion ta logra. ■■■■





Minister Endy Croes:

DOW A RICIBI PRESENTACION DI E PROYECTO MUSEO BETICO CROES



Recientemente, Minister Endy Croes a reuni cu director di DOW Sr. Marlon Croes y staf, en conexion cu e proyecto Museo Betico Croes na retonde di Santa Cruz. Manera ta conoci, e proyecto a inicia dos aña pasa y tin un comision cu ta trahando duro pa por logra cristalisa e museo. E comision ta consisti di diferente stakeholder, entre otro, arkitecto, expertonan di museo y miembronan di e comision.

Minister Endy Croes ta trek e proyecto aki den nomber di Gobierno di Aruba. Durante e encuentro, DOW a ricibi un presentacion di e proyecto cu ta diseña den 3D. Tambe DOW a duna nan “input”, conseho y guia riba e proyecto aki. Lo converti e cas di e mayornan di Betico Croes (den feliz memoria) den un museo ultramoderno cu e historia di Betico, e lider y estadista stima pa su pueblo, unda cu e alumnonan di scol y nos bishitantenan por conoce un poco mas di e bida y lucha di nos libertador pa nos Status Aparte. Minister Endy Croes a indica cu DOW ta hopi contento cu loke nan a mira te cu awo y a comparti algun idea.

“Dentro di poco lo tin un coseho final pa asina por canalisa e bunita proyecto aki. Nos por mira atras riba un bon reunion y un bunita proyecto pa e barrio di Santa Cruz”, Minister Endy Croes a finalisa.

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD